

2 TESALONICENSES

**Marí puráka'aloji Pablo, rijwáke'ena wa'até,
wakara'akare Jesucristo ja'apiyá jema'ajéñojlo**

1 ¹Nuká, kéchami Silvano, eyá Timoteo, kele, lana'año iká wejena, Jesucristo ja'apiyá jema'ajeño pajimila Tesalónica e i'imakáñojlo marí puráka'aloji. Wara'apá Tupana, wawakára'ajeri Jesucristo le'ejena iká. ²Wawata nala'aká inaku palá, ikawíla'ako piyá nakaje nakojé, i'imakáloje palá napalamane aú.

Palá Tupana la'aká neká yukuna marí

³Nojena, inaku wemá Tupánajlo: “Palá pila'aká weká, palá nema'akale pa'apiyá”, ke. Wemá inaku ilé ke, richaje, richaje ke ipechu i'imakale kaphí Tupana chojé. Íki'ija kaja iwátaka richaje ke ajopana ina'ukena. ⁴Ilé ke i'imakaño i'imakale, we'emá iyukuna ajopana Jesucristo ja'apiyá jema'ajéñojlo. Palá wajló iyukuna i'imakana najló, ra'apiyá jema'ajeño i'imakale. Iká amaño chapú kaje yajwé me'etení, e'iyonaja re jo'ó kaja jo'ó ipechu kaphí Tupana chojé; unká ipechu la'aló ujwí riliyá chapú kaje yajwé amaka e'iyonaja.

⁵Palá Tupana we'epika naka palani wajló, ñakele riyurí nala'aká iká chapú me'etení. Kaja riwe'epí re iliyá, ijña'akáloje riká panaku, ripalamane aú iphákalaje je'echú chojé. Rewájena wakára'ajeri riká. Re i'imajíkaño penájena i'imakale, amá me'etení chapú kaje yajwé. ⁶Palá la'ajerí Tupana i'imakale, riwajaje la'año iká chapú me'etení. ⁷Jesucristo witúka'ajika majó je'echú chiyá wakajé, Tupana watána'ataje iká, weká wa'ató, chapú nala'akare weká liyá. Rijwa'atéjena, je'echú chiyájena, kajrú péchuruna wa'até, riphaje majó kajrú kera'athani e'iyowá. ⁸Riwakajé riwajaje piyukeja ina'ukena unká wátalaño rinakojé we'epíkana. Jesucristo palamane aú Tupana i'imatá ina'uké kapichákajo liyá, e'iyonaja kajrú ina'ukena unká a'alaño nanakojó riyukuna. Ripa'ajiko piño majó wakajé, riwajaje neká; ⁹jukajo wani Tupana ka'ajika riliyó

neká. Ñakeja wani ne'emajika kapichájeño penaje riliyá; unká ne'emalaje rijwa'até, unká kaja namálaje palani nakaje rila'ajíkare. ¹⁰Jesucristo iphájikaja majó wakajé, palá rile'ejena ina'ukena pura'ajiko rinaku, nephákale wani ra'apí. Iká i'imajeño kaja najwa'até, jema'akale wa'apiyá riyukuna we'emakare ijló i'imaká ja'apiyá.

¹¹Ilé ke nakaje i'imakáloje ijló penaje wapura'ó Tupana wa'até inaku, i'imakáloje kaliyáruna rijló. Ajopana ina'ukena e'iyayá ri'iwapá rijluwa i'imaká, i'imakáloje palájne'ekena wani. Wemá kaja rijló, ra'akáloje ináthé, ila'akáloje nakaje palá ipechu nakú ri'imaká ke, kaphí péchuruna i'imakale richojé, ra'akáloje ináthé penaje. ¹²Palá ila'akale aú, ñaké kaja ajopana ina'ukena pechu i'imajika palá wawakára'ajeri Jesucristo nakú. Palá kaja ripechu i'imajika inaku raú. Tupana, wawakára'ajeri Jesucristo wa'até, palamane aú ila'ano palá. Ilé kaje aú palá kaja ripechu i'imajika inaku.

Jesucristo pa'ajiko piño majó yukuna marí

2 ¹Chuwa, nojena, Jesucristo pa'ajiko piño majó wakajé, wawakajo pajñakani rijwa'até, raú wemá mawó ijló: ²Ipechu kechíra'aniño ijló ke'iyapé ne'emajika aú ijló, majó ripa'ajiko yukuna. Apala nemaje ka'ajná ijló rinaku: “Kaja Jesucristo iphá majó”, ke.

Apú ka'ajná kemájeri ijló rinakuwá: “Tupana wakára'ari nu'umaká ijló: ‘Kaja riphaka majó yukuna’”, ke.

Apú ka'ajná wakára'ajeri ijló papera kaje, ipechu i'imakáloje wanaku: “Neká japi wakára'año wajló riká”, ke. ³Jema'aniña pajlákachina ja'apiyá. Yewicha Jesucristo iphájika majó piyá, kajrú ina'ukena pechu i'imajika chapú wani Tupana nakú. E'iyowá ke pajluwaja ina'uké iphájika, unká wani ina'ukélari ri'imajika, Tupana kapichátajikare penaje ri'imajika. ⁴Chapú wani ripechu i'imajika Tupana nakú, ñaké kaja ripechu i'imajika ina'uké nakiyana pechu i'imaño: “Wachi'inárikana neká”, ke, nephákarena ja'apí cha. Nachaje rila'ajika rikó. Tupana ñakaré chu ri'imajé nawakára'ajeri ke, rimaje rinakuwá: “Tupana nuká”, ke.

⁵Nu'umaká ijwa'até wakajé, nu'umá kaja ijló riyukuna i'imaká. ¿Kaja chi ipechu kapicháña rika? ⁶Kaja iwe'epí Tupana itaká rapu, riphaka piyá unká chiyó rená iphá rijló. Pu'umaré la'akaná, me'echú i'imakare, keño'ó chuwa unká jema'alaño Tupana ja'apiyajlo, e'iyonaja kalé Ripechu jítá rapu, ri'imaká piyá pu'uwaká wani me'etení. ⁷Tupana jácho'otajikaja eja'awá

nakiyá ra'apiyá jema'ajeño, Ripechu i'imakárena e'iyá ejéchami, ra'ajiko pu'uwaká majó, kele unká wani ina'ukélari numakare nakú. ⁸ Ra'ajiko pu'uwaká ejomi, wawakára'ajeri Jesucristo iphaje majó kajrú mejáma'atani wa'até. Riphájika wakajé, rikapichátaje riká unká wani ina'ukélari. Rinuma chiyá rapho'ojé rikaéjane rinakojé, raú ja rikapichátaje riká. ⁹ Jesucristo iphájika piyá majó, ilé unká wani ina'ukélari la'ajeri kajrú nakaje, unká méño'ojo ajopana la'alare kaje. Raú ripajlaje kajrú ina'ukena wa'até, Jiñá Chi'inárikana a'ajíkale riñathé rila'akana aú. ¹⁰ Kajrú wani ripajlájika kapichájeño penájena i'imajíkano wa'até. Unká wátalaño kewákaje puráka'aloji a'akana nanakojó ne'emakale, ripajlaje najwa'até. Unká na'alá Tupana puráka'alo nanakojó, ne'emakóloje kapichákajo liyá raú. ¹¹ Ñaké ne'emakale, Tupana yurí neká, nema'akáloje mapeja pajlakaje puráka'aloji ja'apiyá. ¹² Piyuke neká, unká wátalaño kewákaje puráka'aloji ja'apiyá i'imakana kapichájeño, apú nakaje chaje nawátakale pu'uwaré la'akaná.

¹³ Palá wemakano Tupánajlo inaku: “Palá pila'aká neká, nema'akale pa'apiyá”, ke. Palani wajló ilé ke inaku kemakana, íki'ija Tupana wátakale iká. Kaja ri'iwapá rijluwa i'imaká, i'imakáloje rila'ejena ina'ukena, ri'imatákarena kapichákajo liyá ajopana tukumá. ¹⁴ Kaja we'emá ijló ri'imataka ina'uké kapichákajo liyá yukuna. Jema'akale palá ra'apiyá, i'imajé wawakára'ajeri Jesucristo wa'até.

¹⁵ Ñakele, nojena, marí puráka'aloji numakare nakú ijló me'etení, wemá nakú kaja ijló i'imaká, we'emaké ijwa'até wakajé. Iyuríniña ra'apiyá jema'akana; ipechu kapicháñaaniña kaja riká. ¹⁶ Eko Jesucristo, wara'apá Tupana wa'até, la'á palá wani iká. Íki'ija Tupana wátaka weká, ñakele wawe'epí palá wani we'emajika rijwa'até wa'ajini wani ripalamane. ¹⁷ Nuwata rila'aká ipechu palá ñakeja wani, kaphí ipechu i'imakáloje richojé, raú ila'ajé piyuke nakaje palá; palá kaja ipura'ajiko palani puráka'aloji nakú pajwa'atéchaka.

**Pablo wátari napura'akó Tupana wa'até
nanaku. Riyukuna marí**

3 ¹ Kaja penaje, nojena, ipura'ó Tupana wa'até wanaku, we'emakáloje palá wawakára'ajeri Jesucristo yukuna ajopánajlo, ajopánajlo ke penaje, kiñaja riyukuna jema'akóloje piyukeja ina'ukena e'iyowá. Ipura'ó kaja rijwa'até, napechu i'imakáloje palá riyukuna nakú, ipechu i'imaká rinaku ke kaja.

²Imá kaja rijló, ri'imatákalaje weká chapújne'ekena ina'ukena liyá, unká piyukeja kalé ina'uké pechu kaphí richojé.

³Tupana kemaká inaku, ke rila'ajika iká palá, unká riyurírlaje iká ikó, rila'ajé ipechu kaphí. ⁴Palá rila'aká iká, ñakele wawe'epí palá la'akaná nakuja i'imajika, wemaká ijló i'imaká ke. ⁵Nuwata Jesucristo a'aká iñathé, iwe'epíkalaje raú íki'ija wani Tupana wátaka iká. Nuwata kaja ra'aká iñathé, ripalamane jácho'oko piyá ra'apiyá jema'akana chiyá, chapú nala'ajika iká e'iyonaja.

Palani inajlo jápakaje. Riyukuna marí

⁶Nojena, wawakára'ajeri Jesucristo apumí chojé ke wemaká ijló, i'imaká piyá wejena nakiyana unká wátalaño jápakaje, eyá unká kaja wátalaño puráka'aloji, wewíña'atakare i'imaká nakú a'akana nanakojó wa'até. ⁷Kaja iwe'epí jápakaje nakojé, wamátakale i'imaká raú. Unká we'emaké ijwa'até mapeja, jápakaje nakuja we'emajíkale. ⁸Unká wakejá'ake iliyá a'ajnejí mapeja. A'ajnejí, a'ajíkare wajló i'imaká, wa'aké wemí ijló. We'echú, lapejé wa'ató wajápake, ika'aká piyá iliñérute nakiyana a'ajnejí wemí wajló. ⁹Kajrú wa'ajika iñathé mapeja i'imaká. Wawátakela, wemajla ijló i'imaká, a'akáloje wañathé nakaje aú mapeja, e'iyonaja unká wawátala ilé ke la'akana ijwa'até. Wajapa i'imaká, ñaké kaja ijápakalaje wamájemi penaje. ¹⁰We'emaké ijwa'até wakajé, wemá ijló i'imaká: “Unká wátalaje jápakaje, unká kaja ajñálaje ra'ajnewá”, ke.

¹¹E'iyonaja kalé wema'á nemaká e'iyowá i'imakaño nakú: “Ijnú wani najápaka; kajrú najápaka unká na kalé la'akana nakú”. ¹²Ilé ke i'imakaño wawakára'a Jesucristo apumí chojé ke, najápakalaje mana'ija, ne'emajowa i'imakáloje palá najló.

¹³Nojena, jaya'aniño palá la'akaná nakú. ¹⁴Unkájika ee pajluwaja inakiyana a'á marí wapuráka'alo rinakojó, i'imaniña rawa'á, rapáña'akoloje raú penaje. ¹⁵Ipechu i'imaniña chapú rinaku, inakiyana jo'ó ri'imakale. Ila'á renakú.

Kaja penaje Pablo kemakare nakú najló marí

¹⁶Palá iná pechu la'ajerí Jesucristo. Nuwata rila'aká ipechu palá, i'imakáloje kaja keja palá péchuruna penaje. Eko ri'imá ijwa'até piyukeja.

¹⁷Nulana'á marí kaja penaje nokoja nuyáthe'ela aú. Kaja ke waja nulana'aká nuiwá Pablo, ke kaja penaje. ¹⁸Nuwata wawakára'ajeri wani Jesucristo la'aká iká palá piyukeja.

Kaja.